

Ilinniartut ineqarfii pillugit Namminersornerullutik Oqartussat nalunaarutaat nr. 18, 1. november 2007-imeersoq Atuussimasoq (Historisk)

Inissianik attartortitsisarneq pillugu inatsisartut peqqussutaanni nr. 2-mi, 12 maj 2005-imeersumi § 3, imm. 3 naapertorlugu inissianik attartortitsisarneq pillugu inatsisartut peqqussutaanni nr. 14, 20. november 2006-imi allangortinneqartumi aalajangersarneqarpoq:

Kapitali 1

Atuuffissaa

§ 1. Nalunaarut Namminersornerullutik Oqartussat ilinniartunut ineqarfiutaannik attartornermut atuuppoq.

Imm. 2. Ilinniartut ineqarfii imm. 1-imi pineqartut tassaapput inissiat Namminersornerullutik Oqartussanit ilinniagaqartunut ilinniarnerminni inissaattut atugassanngortinneqartartut.

Kapitali 2

Ilinniartunut inissiamik qinnuteqartarneq

§ 2. Ilinniarniarlutik qinnuteqartut, Suliffeqarnermut Inuussutissarsiutinullu Ilinniartitaanernut Pisortaqarfiup ilinniarfiisa akuerineqartut ilaannut ilinniagaqalernissamik akuerineqarsimasut, ilinniagassarlu akuerisaasoq tunngavigalugu ilinniagaqarnersiuteqarnissamik pisinnaatitaaffiliisuni ilinnialersinnaasunut, allaganngorlugu ilinniagaqartut ineqarfiisa aqutsisoqarfiannut inissamik atugassinneqarnissamik qinnuteqartoqarsinnaavoq. Namminersornerullutillu oqartussat ukiut ataasiakkaalugit ilinniartunut inissiamik atugassiisarpoq.

Imm. 2. Ilinniagaqartut inissiaataannik aqutsisoqarfiup inissianik attartortitsisarneq imatut tulleriinnilimmik ingerlatissavaa:

- 1) Ilinniartunut avataaneersunut ilinniarfimmu illoqarfimmi allami imaluunniit ilinniartup nammineq angerlarsimaffittut illoqarfiginngisaani nunaqarfiginngisaaniluunniit pisumut akuerineqarsimasunut, imaluunniit ilinniagaqartunut avataaneersunut inuussutissarsiutinut ilinniartitaanermit ilinniagaqalertussanut, sungiusaammillu suliffeqartussanut, Kalaallit Nunaanni illoqarfimmi allami ingerlanneqarsinnaanngitsunut, taamaattorli immikkoortut 2-anni allassimasut naapertorlugit.
- 2) Ilinniartunut avataaneersunut ilinniagaqartunut inissianut salliutinneqartussanut, ilinniagaqalerniarloq ilinniagariligassaminut tiguneqareersimagaangat, ilinniagaqartunullu inissiaateqartoqartillugu.
- 3) Ilinniartunut avataaneersunut lærlingit ilinniagaqalernissamut isumaqatigiissumik atsiugaqarsimasunut, ilinniagaqarnissamut sungiusaammilluunniit sulinissamut ingerlatsivimmut suliffeqarfimmulluunniit isumaqatigiissuteqarsimasunut ingerlatsiviup suliffeqarfiulluunniit

ilinniagaqartumut nammineerluni inissaqartitsisimangippat, ilinniartunullu inissianik atunngitsoqarpat. Qinnuteqarneq ingerlatsivimmu suliffeqarfimmilluunniit isumagineqassaaq, lærlingitullu ilinniagaqarnissamut isumaqatigiissut, ilinniagaqalernissamik isumaqatigiissut sungiusaammilluunniit sulinissamik isumaqatigiissut ilanngunneqassalluni.

4) Ilinniartunut gymnasiami ilinniagaqarnissamut tiguneqarsimasunut, imaluunniit inuussutissarsiutitaarniarluni ilinniagaqalernissamut akuerisaasimasunut, aammalu ilinniagaqartunut sungiusaammik suliffeqarlernissamut Kalaallit Nunaanni illoqarfimmi allami akuerisaasimasunut.

5) Ilinniagaqartunut ingerlaqqiffiusumik ilinniagaqarnissamut tiguneqarsimasunut.

Imm. 3. Ilinniagaqartut ineqarfiisa allattoqarfiat immikkut illuinnartutigut, minnerunngitumillu isumaginninnikkut pissutsinik tunngaveqartumik, inissaqartitsinikkullu periarfissaqartillugu ilinniagaqartut imm. 2-mi, imm. 1-3-mi immikkoortorlu 4 naapertorlugu piffissami killilikkami ilinniagaqartunut inissiamik atugassiisnaavoq.

Imm. 4. Ilinniagaqartoq avataaneersutut isigineqassaaq, imm. 2-mi nr. 1-3 naapertorlugit, ilinniagaqartoq minnerpaamik ilinniagaqarnerup aallartinnginnerani ukiuni marlunni ataavartumik illoqarfiup ilinniagaqarfigisassap avataani najugaqarsimaguni.

Imm. 5. Ilinniartut meeraat, aappaat inooqataalluunniit ilinniagaqarnerisutit pillugit nalunaarut naapertorlugu akiliunneqarlutik angalasinnaatitaasut inissaqartillugu ilinniartoq peqatigalugu ilinniartut ineqarfianni ineqartinneqarsinnaapput. Inooqatigiinnut sivikinnerpaamik ukiumi ataatsimi inooqatigiissimaneq uppersaasiunneqassaaq. Ilinniartup meeraat, aappaa inooqataaluunniit nalunaaruteqaqqaarani ilagineqartut ilinniartut ineqarfianni najugaqartinneqarsinnaangillat. Meeqqat 18-it sinnerlugit ukiullit nassarneqarsinnaatitaangillat.

Imm. 6. Ilinniartut sulisunut inissiamik tunineqarsinnaasunik aappaqartut inooqateqartulluunniit ilinniartut ineqarfiini inissamik tunineqarsinnaatitaangillat imaluunniit taamaattumi najugaqaannarsinnaatitaanatik.

§ 3. Ilinniagaqartunut inissiaritinneqartuni inissiamik tunniussisarnermi piumasaqaataavoq ilinniagaqartup ilinniarnerninik ingerlatsinera aammalu Kalaallit Nunaannut attaveqavissuunera, Namminersornerullutik Oqartussat ilinniagaqarnerisuteqarneq pillugu nalunaarutaat naapertorlugu.

Imm. 2. Ilinniartut ineqarfiisa allaffeqarfiat imm. 1-imi pineqartoq naammassineqarsimangippat ilinniagaqarfiup inassuteqarnera tunngavigalugu ilinniagaqartup inissiamik tigumminniinnarnissaa akuerigallarsinnaavaa, qaammatit 4 angullugit sivilissuseqartumik, tamanna immikkut ittunik pissutissaqartinneqarpat, tassunga ilanngullugu assersuutigalugu ilinniagaqartoq kursusernissamut peqataaniarluni nalunaarsimappat, ilinniagaqarfigisaminulluunniit isumaqatigiissuteqarsimappat ilinniarnermut atasumik nalunaarusiornissamik, minnerpaamik ukiup ilinniarfiusup affaanik sivilissuseqartumik 30 ETC-points-itunut nallersuunneqarsinnaasumik.

Kapitali 3

Ilinniagaqartunut inissiatinik aqutsineq

§ 4. Namminersornerullutik Oqartussat ilinniartunut inissiaataat naatsorsuuserinermi immikkoortunut inissinneqassapput, taamaalilluni inissiaqarfik ataatsimoortoq ataaseq, inissiaqatigiit ataatsimoortut aallaavigalugit aqukkuminartunngorlugit, taamaattoq imm. 2 naapertorlugit.

Imm. 2. Nuummi ilinniartut ineqarfii ilinniartut ineqarfiisa allaffeqarfiannit ataatsimut allaffissornikkut aqunneqarput, Ilinniarnertuunngorniarfiulli ilinniartunut inissiaatai pinnagit. Ilinniartut ineqarfiisa sinneri ilinniartunut inissiaatit aqutsiviannit ineqarfiup aqutsisuinit toqqarneqartunit aqunneqassapput. Ilinniartut ineqarfiisa allaffeqarfiat tassaasinnaavoq ilinniarfimmi ilinniagaqartut atuarfisaaanni pisortat sulisulluunniit.

§ 5. Ilinniartut ineqarfiisa allaffeqarfiat ineqarfiup ulluinnarni ingerlanneqarnerani isumaginnittuussapput, nalunaarummi uani aalajangersakkat ineqarfiullu malittarisassai naapertorlugit.

Imm. 2. Ilinniagaqartut ineqarfiannik aqutsisut akisussaassuseqartumik ineqarfiup aqunneqarnissaa nakkutigissavaat. Ingerlatsineq allaffissornikkut pisariillisakkamik ingerlanneqassaaq, aqutsinermilu aningaasartuutit appasinnerpaaffissaminiitinneqassallutik.

Imm. 3. Allaffissornikkut aqutsinermi najugaqartut soqutigisaat pitsaanerpaamik isumagineqassapput, ineqarfiullu suliassaatai pitsaanerpaamik ingerlanneqassallutik.

§ 6. Ilinniagaqartut inissiaannik aqutsiviit tamarmik ineqarfiup malittarisassaanik aalajangersaassapput.

Imm. 2. Ilinniagaqartut inissiaannik aqutsiviup ilinniagaqartut inissiaanni ileqqurissaarnissamut malittarisassat suliarissavaat, atortussangortinneqartussat najugaqartunut saqqummiunneqareerunik. Ileqqurissaarnissamut malittarisassat tassaasinnaapput eqqiaasarneq, ataatsimiinnissani aggertussaaitaaneq, imigassanik aalakoornartortalinnik atuineq, nipiliorneq, pulaartoqarsinnaatitaaneq allallu.

§ 7. Ilinniartut ineqarfiisa allaffeqarfiata missingersuusiormi ilitsersuutit qaqugukkulluunniit atuuttut kiisalu Namminersornerullutik Oqartussanut naatsorsuuserinermut naatsorsuusiormullu malittarisassat qaqugukkulluunniit atuuttut malissavaat.

§ 8. Ilinniartut ineqarfiisa allaffeqarfiata iluminni atuuttussamik utaqquisut allassimaffianik suliaqarsinnaapput, najugaqartut qanoq sivisutigisumik najugaqarsimanerat naapertorlugu inissamillu pisariaqartitsinerat naapertorlugu tullerriaarneqartumik.

§ 9. Ilinniartut ineqarfiisa allaffeqarfiat akisussaavoq attartortitsinermi attartormillu taamaatitsisarnermik isumaginninnerup nalunaarummi aalajangersarneqarsimasut naapertorlugit ingerlanneqarnerannut.

Kapitali 4

Najugaqartut siunnersuisoqatigiivi

§ 10. Ilinniartut ineqarfiini tamani najugaqartut siunnersuisoqatigiivini pilersitsisoqarsinnaavoq makkunanga suliaqartussanik:

- 1) najugaqartut akornanni ulluinnarni suliassat aqqissuunneqarnissaannik agguataarneqarnissaannillu suliaqartussanik,
- 2) ilinniartut ineqarfianni najugaqartut ulluinnarni toqqissisimasumik atugaqartinneqarnissaannik qularnaarisussanik.
- 3) ilinniagaqartut ineqarfiata torersuunissaanik isumaginnittunik, kiisalu
- 4) ineqarfiup paarineqarnerata aserfallatsaalineqarneratalu nakkutigineqarneranik isumaginnittunik.

Imm. 2. Ingerlatseriaatsip najugaqartut ilinniartut ineqarfiannik ulluinnarni ingerlatsinermut sunneeqataasinnaaneranik tunngaveqarnissaa, kiisalu najugaqartut 18-it inorlugit ukiullit inersimasumit nakkutigineqarnissaasa qularnaarneqarnissaat isumagineqassaaq.

Imm. 3. Najugaqartut siunnersuisoqatigiivi suleriaatsimut maleruagassami suliassat pillugit ersarinnerusumik allaaserinnissinnaapput.

§ 11. Najugaqartut siunnersuisoqatigiivnut ilaasortaaneq akissarsiaqaataanngilaq.

Imm. 2. Taamaattorli siunnersuisoqatigiit sulinerannut atatillugu ilinniartut ineqarfiisa allaffeqarfiat aningaasartuuteqalaarsinnaavoq soorlu allakkanik nassitsinermut, kopeerinermut aammalu allattuinermit atortussanut siunnersuisoqatigiit sulineranni atorneqartussanut, soorluttaaq ilinniagaqartunut inissiaatinik aqutsinermi ilaannakuusumik tamakkiisumilluunnit akissarsialiisoqarsinnaasoq, soorlu aserfallatsaaliinernut minnerusunut.

Kapitali 5

Attartornermut isumaqatigiissut, akiliuteqartarnek qularnaveeqquusiinerlu

§ 12. Inissiamik attartorneq pillugu isumaqatigiissut kalaallisut danskisullu allaganngorlugu suliarineqarsimassaaq, Ilinniartitaanermullu Pisortaqarfimmit akuerisaassalluni. Ineqarnermut akiliut attartorneq pillugu isumaqatigiissummi allassimassaaq. Ilinniartut ineqarfianni najugalik kingusinnerpaamik iserternerminut atatillugu attartorneq pillugu isumaqatigiissummik, aamma pisattat nalunaarsornerannut takussutissartalimmik atsiussaaq.

Imm. 2. Ilinniartut ineqarfianni najugalik kingusinnerpaamik attartorneq pillugu isumaqatigiissummik atsiornermut atatillugu ilinniartut ineqarfianni maleruagassanik ilinniartullu ineqarfianni torersaarnissamut malittarisassanik tunineqassaaq.

Imm. 3. Attartorneq pillugu isumaqatigiissummi aalajangersakkat ilinniartut ineqarfianni najugaqartumut annerusunik pisussaaffiliisut nalunaarummiluunniit taaneqartunit ikinnerusunik pisinnaatitaaffeqartitsisut isumaqatigiissummi erseqqissaatigineqassapput.

§ 13. Attartornermut isumaqatigiissuteqarnermi ilinniagaqartut inissiaanni ineqartussap ineqarnermut siumut akiliutissaq qaammammi ataatsimi attartornermut akiliutip nalinga najugaqartup ineqarfigisaminit nuunnissaani pisussaaffigisinnaaasaanut sillimmatitut akilertassavaa.

§ 14. Ineqarnermut akiliut aningaasanut inatsimmi aalajangersarneqartarpoq.

§ 15. Ilinniagaqartunut inissiami najugaqartup najugaqarnermut isumaqatigiissummi piffissaliussaasoq naapertorlugu akiliutissani akilertassavaa, taamaattoq imm. 4 naapertorlugu.

Imm. 2. Akiliuteqarnissaq kingusinnerpaamik akiliiffissarititaasumiit ulluinnaat 3 qaangiunneranni isumagineqassaaq. Ulloq taanna arfininngorneruppat imaluunniit inuiattut ullorsiortarfiuppat, ulloq akiliiffissaq kingulleq tassaassaaq ulluinnaq siulleq.

Imm. 3. Ilinniartut ineqarfianni najugalik piffissami attartorneq pillugu isumaqatigiissummi aalajangersarneqartumi attartornermut akiliissaaq, taamaattorli imm. 4 takuuk. Akiliiffissamik innersuussisoqarsimangippat ineqarnermut akiliutissaq Ilinniagaqartut ineqarfiisa allaffeqarfianni akilerneqassaaq. Aningaaserivimmi allakkerivimmiluunniit akiliineq akiliiffissami akiliinertut

isigineqassaaq.

Imm. 4. Ilinniagaqartut ineqarfianni najugaqartooq ilinniagaqarnersiuteqartuuppat, Ilinniagaqartut ineqarfiisa allaffeqarfiata ineqarnermut akiliutissaq ilinniargaqarnersiutissiassanit ilanngaatisinnaavaa, ilinniagaqarnersiuteqarneq pillugu peqqussummi § 24 naapertorlugu.

§ 16. §§-it 12,13, aamma 15 saneqqunneqarsinnaanngillat ilinniagaqartut ineqarfianni najugaqartumut ajoqutaasumik.

Kapitali 6

Aserfallatsaaliineq iluarsaanerlu

§ 17. Ilinniartut ineqarfiisa allaffeqarfiata ilinniartut ineqarfiini inissiaq attartornerup aallartiffissaatut isumaqatigiissutaasumit ilinniartut ineqarfianni najugaqartumut pitsaasumik illersorneqarsinnaasumillu isumagineqarsimasooq atugassanngortissavaat. Illersorneqarsinnaasumik isumagineqarsimasooq isumaqarpoq ilinniartumut inissiaq peqqinnissamut uloriarnartuussanngitsooq, soorluli aamma assersuutigalugu natsermi putoqassanani. Ilinniartulli ineqarfianni najugaqartup nuunnerminut atatillugu ilinniartut ineqarfianni allaffissornikkut aqutsisut immikkut aserfallatsaaliinermik assersuutigalugu nutaamik qalipaasoqarsimanissaanik piunasaqarsinnaanngilaq.

Imm. 2. Ilinniartumut inissiaq iserterfigineqarnermini:

1) nalinginnaasumik aserfallatsaaliineqarsimassaaq, imatut paasillugu qilaaq iikkallu qalipanneqarsimassasut, natserlu qisuusooq lakkerneqarsimalluni, kiisalu

2) uumasuaqassanani, igalaat ilivitsuussallutik, skaviit matui, matut, parnaarsartut, teknikikkullu atortorissaarutit ajoquteqassanatik.

Imm. 3. Ilinniagaqartut ineqarfianni najugaqartussaqaq iserternerminut atasumik minnerpaamik ilinniartut ineqarfiannut matuersaatit 2-nik tunineqassaaq.

Imm. 4. Ilinniartut ineqarfiat najugarineqartussaqaq attartulernerup aallartinnerani amigaateqarpat ilinniartut ineqarfianni najugaqartup amigaatigineqartunik pisinnaatitaanini annaajumanagu kingusinnerpaamik attartulernermit ullut 14-nit qaangiuppata ilinniartut allaffeqarfiannut nalunaassaaq pineqartut piunallugit. Amigaatilli nalinginnaasumik misissuinerminni takuneqarsinnaasimanngippata imaluunniit attartortitsisoq peqquserlussimappat tamanna atuutissanngilaq.

Imm. 5. Ilinniagaqartut ineqarfianni allaffissornikkut aqutsisut ineqartoq amigaataasunik isumaginnittussanngortissinnaanngilaat, ineqartup aqutsisunut kingusinnerpaamik iserternermiit ullut 14-it qaangiunneranni uparuareersimasai.

§ 18. Ilinniartut ineqarfianni sumiiffiit ataatsimoorussat isumannaatsumik aserfallatsaaliorneqarnissaat ilinniartut ineqarfiisa allaffeqarfiata isumagissallugu pisussaaffigat.

Imm. 2. Avammut kuuffinnut, kiassarnermut, innaallagissamut, gassimut imermullu teknikikkut atortulersuutit tamarmik pitsaasuutinneqassapput atorsinnaasuutinneqassallutillu. Taamatuttaaq innaallagissamut ikkuffiit, matserfiit, kiassaait, ruujorit, sikaaviit aalaakkaasut, illup iluani atortut il.il. aserfallatsaalissallugit ilinniartut ineqarfiisa allaffeqarfiata pisussaaffigai. Nungullarnikut pisoqalisullu ima akulikitsigisumik ilinniartut ineqarfiisa allaffeqarfiannit isumagineqartassapput ilinniartut tassanilu najugaqartut eqqarsaatigalugit pisariaqartitsinerit malillugit.

§ 19. Piffissami attartorfiusumi ilinniartut ineqarfianni najugallip attartukkami qilaat qalipallugit qaqorsarnissaat, iikkat qalipannissaat aamma/imaluunniit tapiitilersornissaat kiisalu natit lakkernissaat akisussaaffigaa. Taamatutaaq piffissami attartorfiusumi ilinniartut ineqarfianni najugallip matuersaaserfiit matuersaatillu pisariaqartinneqarpat aserfallatsaalillugillu nutartertassavai.

§ 20. Ilinniartut ineqarfianni najugarisaq iserternermi eqqiarneqarsimangippat attartornerullu nalaani pitsaasuunanilu isumannaatsuungippat § 17, imm. 1 aamma imm. 2 naapertorlugit, tamannalu ilinniartut ineqarfianni najugaqartup ilinniartut ineqarfiisa allaffeqarfiannut ilisimatitsissutiginnereernerani taakku pisariaqanngitsumik kinguarsaanatik naammaginartumik amigaataasunik iluarsiinngippata ilinniartut ineqarfianni najugalik attartornermi akiliutiminik naapertuuttumik appaavigineqarnissaminik piunasaqarsinnaavoq, amigaataasut ajoqutaasulluunniit iluarsineqarnissaasa tungaannut, taamaattorli § 17, imm. 4 takuuk.

§ 21 . Ajoqutit iluarsineqarnissaat kinguartinneqarsinnaanngitsut ilinniartut inissiaanni ineqartup ingerlaannartumik ilinniagaqartut ineqarfianni allaffissornikkut aqutsisunut nalunaarutigissavai. Ajoqutit allat ineqartup kinguarsarnagit aamma nalunaarutigisassavai.

Imm. 2. Ilinniartut ineqarfianni najugaqartup pissutissaqavinnikkuni ilinniartut ineqarfiisa allaffeqarfiata inissiamik misussuiniarpata itigartissinnaanngilai, taakkua:

- 1) inatsisinik unioqqutitsilluni atuisoqarnersoq
- 2) aserfallatsaaliinerup qanoq issusianik paasiniaallutik,
- 3) iluarsaassisoqassatillugu imaluunniit
- 4) allanut attartortitsisoqassatillugu inissiamik misissuiniarpata inissiamut isernissaannik itigartissinnaanngilai.

Imm. 3. Nakkutilliilluni misissuinermi paasineqarpat paarinerluisoqarsimasoq, ilinniartut ineqarfianni najugaqartup kinguarsaanertaqanngitsumik iluarsagassat iluarsassavai, ilinniartut ineqarfiisa allaffeqarfiata tamanna piunasarippassuk.

Imm. 4. Ilinniartut ineqarfiisa allaffeqarfiat sapaatit akunnerinik 2-nik siumut ilisimatitsereermigut ilinniartut ineqarfianni najugarineqartumi suliassanik aallartitsisinnaavoq, suliat ingerlanneqarnissaat najugaqartumut annertuumik akornutaassanngippat. Sulianik allanik aallartitsisoqartinnagu najugaqartoq sapaatit akunnerinik 4-nik siumut ilisimatinneqareertussaavoq. Taamaattorli ilinniartut ineqarfiisa allaffeqarfiata tamatigut suliassanik kinguartinneqarsinnaanngitsunik siumut ilisimatitseqqaarani iluarsaassisinnaavoq.

Imm. 5. Suliat suugaluartulluunniit ilinniartut ineqarfianni allaffissornikkut aqutsisunit aallartinneqartut unitsinneqaratik najugaqartumullu sapinngisamik annertunerpaamik mianerinnilluni sularineqartassapput. Ilinniartut ineqarfiisa allaffeqarfiat ingerlaannartumik suliat malitsigisaannik iluarsaassisassapput.

§ 22. §§-it 17 aamma 18 sanioqqunneqarsinnaanngillat ilinniagaqartut ineqarfianni najugaqartumut ajoqutaasumik.

Kapitali 7

Ilinniartut ineqarfianni najugaqartup ilinniartut ineqarfianni najukkaminik atuinera

§ 23. Ilinniartut ineqarfianni najugaqartup kiisalu inuit attartortumit attartorneqartumut isersinnaatitaasut illumi torersaarnissamut maleruagassat ilinniartut ineqarfiannik allaffissornikkut aqutsisunit aalajangersarneqartut ilinniartut ineqarfiannut atuuttut maleruassavaat, § 6 imm. 2 naapertorlugu.

§ 24. Ilinniartut ineqarfianni najugaqartup ilinniartut ineqarfianni najugarisaq isumannaatsumik paarissavaa, ajoqusikkanullu ilinniartut ineqarfianni najugaqartup nammineq, taassuma inoqutaasa, allalluunniit ilinniartut ineqarfianni najugaqartup isersinnaatitaasa pilersitaannut ajoqusersimasaannullu taarsiinissamut ilinniartut ineqarfianni najugaqartoq akisussaavoq.

§ 25. Nalaatsornikkut ilinniartut ineqarfianni ajutoornerup kingunerisaanik ajoquisiisoqarpat, ilinniartut ineqarfianni allaffissornikkut aqutsisunit eqqiluitsuutinneqartussami isumannaatsuutinneqartussamilu, ingerlaannaq ilinniartut ineqarfianni najugaqartup ilinniartut ineqarfisa allaffeqarfiat nalunaarfigissavaa.

§ 26. Ilinniartut ineqarfianni najugaqartup ilinniartut ineqarfiisa allaffeqarfiat akuersitseqqaarnagu ilinniartut ineqarfianni najukkani isumaqatigiissutaasumit allaasumik atussanngilaa, tassunga ilanngullugu:

- 1) ilinniartut ineqarfianni inisimasoqartoqarsinnaanngilaaq, imaluunniit
- 2) ilinniartut ineqarfianni najugaqartup ilinniartut ineqarfianni najukkani allanut atukkiutissanngilaa.

§ 27. Ilinniagaqartut ineqarfianni najugaqartoq:

- 1) Ilinniartut ineqarfianni najugaqartoq ilinniartut ineqarfiisa allaffeqarfiat akuersiseqqaartinnagu ilinniartut ineqarfianni najukkamini allanngortitsisinnaanngilaaq §§ 28-aamma 29-mi taaneqartunit allaanerusunik inissinanilu pequsersuisinnaanani.
- 2) Umasuuteqaqqusaanngilaaq.
- 3) Ilinniartut ineqarfiisa allaffeqarfiat akuersiteqqaarnagu ilinniagaqartunut inissiami aallaasinik eqqussisoqaqqusaanngilaaq. Akuerisaasumik aallaasit nassarneqarsimasut ilinniartut ineqarfiisa allaffeqarfianni skaavimmi parnaarsartumi uninngatinneqassapput.

§ 28. Ilinniartut ineqarfianni najugaqartoq ilinniartut ineqarfianni allaffissornikkut aqutsisunut allakkatigut isumaqatigiissuteqareerluni assersuutigalugu telefonimik, internet-imut attaveqaammik il.il. ilinniartut ineqarfianni najukkamini nammineq akilerlugu immikkut ikkussuititsisinnaavoq, taamaattoq immikkoortoq 2 naapertorlugu.

Imm. 2. Ilinniagaqartut ineqarfianni najugartup imm. 1 naapertorlugu pisinnaatitaaffia atuutinngilaaq, ilinniartut ineqarfiisa allaffeqarfiata uppersarsarpagu iliniartunut inissiami innaallagissamut atortorissaarutit naammangitsut atortorissaarusersuinissamut, imaluunniit atortorissaarusersuineq najukkamut najugaqartunulluunniit ajoqutaassasoq.

§ 29. Ilinniartut ineqarfianni najugaqartoq immikkut imaluunniit ataatsimoorussamik ilinniartut ineqarfiisa allaffeqarfiata innersuussinerisigut radiup TV-llu aallakaatitaannik tigooqqaanissamut radiomut fjernsynimulluunniit antenniliisinnaatitaavoq, taamaattorli imm. 2 takuuk.

Imm. 2. Ilinniartut ineqarfianni najugaqartup imm. 1 naapertorlugu pisinnaatitaaffia atuutinngilaaq ilinniartut ineqarfiisa allaffeqarfiata uppersarsarsimappagu ikkussuineq najugaqartunut ajoqutaassasoq. Pisinnaatitaaffik aammattaq atuutinngilaaq najugaqartoq programminut kissaatigisaminut takunnissinnaappat, ilinniartunut ineqarfimmi ataatsimoorussamik TV-iikkut attaveqaataasut

aqqutigalugit, imaluunniit ilinniartunut ineqarfimmi ataatsimoorussamik antennit periarfissaasut allat aqqutigalugit.

§ 30. Ilinniartut ineqarfianni najugaqartoq ilinniartut ineqarfiisa allaffeqarfiat siumut allakkatigut akuersissuteqarteqqaarlugut inunnik isumaginninnermi inatsisini aalajangersakkat malillugit iluaqusersuutininik, assersuutigalugu kalerrittaatinik, majorallattarfimmik, uffarfimmik igaffimmilluunniit allannngortiterinikkut immikkulluunniit ilusilersuinikkut ikkussuisinnaatitaavoq. Ilinniartut ineqarfiisa allaffeqarfiat ilinniartut ineqarfianni najugaqartup attartukkaminik qimatsinermini inissiap pissusiatut pilerseqqinnissaa aamma kommunalbestyrelsip najukkap pissusaatut pilersitseqqinnermut aningaasartuutit akilerneqarnissaannut qularnaveeqqusiinissaa piumasaqaatigisinnaavaa.

§ 31. Ilinniartut ineqarfianni najugaqartoq ajoqusikkanut ikkussukkamineersunut taarsiinissamut akisussaavoq.

§ 32. Ilinniartut ineqarfianni najugaqartup najukkani qimassinnaangilaa § 41, imm. 1, nr. 4 naapertorlugu ilinniartut ineqarfiisa allaffeqarfiat isumaqatigiissuteqarfigeqqaartinnagu.

Imm. 2. Imm. 1-imi aalajangersakkamik malinninnginnermi ilinniartut ineqarfianni najugaqartup ineqarnermut akiliutit akiligassarai attartorneq pillugu isumaqatigiissutip eqqortumik ilimasaarinikkut atorunnaarsinneqarnissaata tungaanut, tak. § 36.

Kapitali 8

Atuisinnaatitaanerup allanut tunniunneqarnera

§ 33. Ilinniartut ineqarfiisa allaffeqarfiat pisariaqartutut isigineqarpat ilinniartut ineqarfianni najugaqartoq inissiamut allanut innersuussinnaavaa, assersuutigalugu aserfallatsaaliilluni suliani annertuunik ingerlatsisoqartillugu, pitsanngorsaataasunilluunniit suliaqartoqartillugu, imaluunniit ilinniagaqartunut inissiami inoqutigiit ilaasa nuunnerat pisimappat.

§ 34. Ilinniartut ineqarfianni najugaqartup najukkami allanut attartortissinnaanera pisinnaatitaaffiginnngillaa.

Imm. 2. Ilinniartut ineqarfianni najugaqartoq ilinniartut ineqarfiisa allaffeqarfiat akuersitissimanagu najukkaminik najugaqartoq alla paarlaasseqatigisinnaangilaa.

Imm. 3. Ilinniartut ineqarfianni najugaqartoq illoqarfiup ilinniartut ineqarfianni inigisaminik suliarortussaq imaluunniit atuarallartussaq peqannginnerminni ilinniartut ineqarfianni inigisaminik atugassanngortitsinissamut pisussaaffeqarpoq, peqannginnissaq sivikinnerpaamik qaammatinik marlunnik sivisussuseqarpat. Ilinniartut ineqarfianni ajugaqartoq inigisaminik ilinniartut ineqarfiisa allaffeqarfiannut atugassanngortitsisoq peqannginnermini inigisamut akiliuteqassanngilaq.

§ 35. Ilinniartut ineqarfianni najugaq ilinniartut ineqarfianni najugaqartup aappaanut inooqataanulluunniit imaaliallaannaq tunniunneqarsinnaangilaq.

Imm. 2. Imm. 1 naapertorlugu atuisinnaatitaanerup allanut tunniunneqarnera taamaallaat ilinniartut ineqarfiisa allaffiannut ilinniartut ineqarfianni inissamik tunineqarnissamik qinnuteqaqqinnikkut pisinnaavoq.

Kapitali 9

Ilinniartut ineqarfianni najugaqartup taamaatitsinera

§ 36. Ilinniartut ineqarfianni najugaqartup attartornini atorunnaarsissinnaavaa sivikinnerpaamik qaammat ataaseq sioqqullugu qaammatip naanissaanut allakkatigut ilimasaarereerermigut, attartorneq pillugu isumaqatigiissummi sivikinnerusumik piffissaliussilluni ilimasaarisqaarnissaanik allassimasoqangippat.

Imm. 2. Ilinniartut ineqarfianni najugaqartup attartornermut akiliutissat sinneri akilissavai ilinniartut ineqarfianni najugaqartup najukkani piffissaq isumaqatigiissutaasoq sioqqullugu qimappagu. Ilimasaarinissamat piffissaliussap qaangiutinnginnerani ilinniartut ineqarfianni najugaqartup najukkani qimappagu ilinniartut ineqarfianni najugarisap piaarnerpaamik attartorneqaqqilernissaa ilinniartut ineqarfiisa allaffeqarfiata sulissutigissavaa. Allamat attartortitsinermi ilinniartut ineqarfiisa allaffeqarfiata isertitat isertitassaraluilunniit ilinniartut ineqarfianni najugaqartumut piunasaqaatigisaannit ilanngaatigineqassapput.

§ 37. Ilinniartut ineqarfianni najugaq § 20-mi taaneqartutut amigaateqarpat ilinniartullu ineqarfianni allaffeqarfiup tamanna piffissap sivisuallaanngitsup ingerlanerani ingerlaannaq iluarsinngippagu iluarsineqarsinnaanngippallunniit ilinniartut ineqarfianni najugaqartup attartorneq pillugu isumaqatigiissut allakkatigut taamaatitsinnaavaa, amigaat annertuutut isigineqartariaqarpat, ilinniartullunniit ineqarfiannik allaffissornikkut aqutsisut peqquserlussimappata. Ilinniartut ineqarfianni najugaqartup attartornerminik taamatitsinnginnerani amigaat iluarsineqarpat ilinniartut ineqarfianni najugaqartup kingusinnerusukkut amigaat attartorunnaarnissaminut patsisigisinnaanngilaa.

Ilinniartut ineqarfiisa allaffeqarfiata taamaatitsinera

§ 38. Ilinniartut ineqarfiisa allaffeqarfiata ilinniartut ineqarfiini najugaqartup attartornera unitsissava, ilinniagaq naammassineqarpat unitsinneqarpallunniit, taamaattorli imm. 3 takuuk. § 3 naapertorlugu ilinniakkamik ingerlatsinnginneq tamatumunnga atatillugu ilinniakkamik unitsitsinertut isigineqarpoq, taamatullu aamma atuangiffeqarallarnikkut, aamma erninermut atatillugu atuangiffeqarnikkut unitsitsigallarneq, ilinniakkamik unititsinertut isigineqarluni, taamaalillunilu ilinniartut ineqarfianni najugaqarsinnaatitaaneq aamma pisuni taakkunani taamatissalluni, takuuk imm. 2.

Imm. 2. Ilinniakkap, atuarnerullunniit naammassineqarnerani, imaluunniit ilinniakkamik unititsinermi ilinniartut ineqarfianni najugaq ilinniarnep taamaatinneraniit unitsinneqarneraniillunniit kingusinnerpaamik ullunnaat 10 qaangiunneranni qimanneqarsimassaaq, taamaattorli imm. 3 takuuk.

Imm. 3. Ilinniartut ineqarfianni najugaqartoq ilinniarneminit anisitaappat anisitaaninilu pillugu allaffissornikkut oqartussaasunut allanut naammagittaalliorpat, ilinniartut ineqarfianni najugaqartoq anisitsineq pillugu inaarutaasumik aalajangiisoqarnissaata tungaanut najugaqaannarsinnaatitaavoq.

§ 39. Ilinniartut ineqarfiisa allaffeqarfiata ilinniartut ineqarfianni najugaqartoq attartortuuneranit taamaatitsissinnaavaa aatsaat taassuma:

1) Ilinniartut ineqarfianni najukkani isumannaatsumik pisimangippagu, tak. § 24.

2) § 26-mi aamma § 27-mi aalajangersakkat unioqquaterujussuarsimappagit.

3) Naak ilinniartut ineqarfiisa allaffeqarfianniit aallakkatigut mianersoqqussutinik marlunnik tunineqaraluarluni, pissuserisassanik taakkununnga ilanngullugit § 23 naapertorlugu torersaarnissamut malittarisassanik malinninngippat, imaluunniit pissusilersornera najugaqartunut allanut akornutaappat, pissutsilli ima ajortiginngippata, assersuutigalugu nakuusertoqarluni aserorterisoqarluniluunniit attartortitsisup attartornermik isumaqatigiisummik atorunnaarsitsinnaanani.

§ 40. Ilinniartut ineqarfiisa allaffeqarfiata § 39 naapertorlugu attartorunnaarsitsinera allakkatigut pissaaq, taakkulu imm. 2 malillugu ilinniartut ineqarfianni najugaqartup akerliusinnaatitaanera pillugu paasissutissartaqassallutik.

Imm. 2. Ilinniartut ineqarfianni najugaqartup attartorunnaarsitsineq akueriumanngikkuniuk attartorunnaarsitsinissaq pillugu nalunaarutip tigoneranit sapaatit akunneri marluk qaangiutsinnagit tamanna pillugu maalaaruteqassaaq. Maalaarut aalajangiinermik atorunnaarsitsigallassaaq.

§ 41. Ilinniartut ineqarfiisa allaffeqarfiata attartorneq pillugu isumaqatigiissut atorunnaarsissinnaavaa imatut pisoqartillugu:

1) Ineqarnermut akiliinngitsoornermi, takuuk § 15, imm. 1.

2) Ilinniartut ineqarfianni najugaqartup najukkani paarinerluppagu, takuuk § 24.

3) Ilinniartut ineqarfianni najugaq isumaqatigiissutaasumit allanut atorneqarpat, takuuk § 26.

4) Ilinniartut ineqarfianni najugaqartup ilinniartut ineqarfiisa allaffeqarfiat isumaqatigiissute qarfigeqqaarnagu najukkani qimappagu, takuuk § 32.

5) Ilinniartut ineqarfianni najukkami akuerineqanngitsumik aallaasinik toqqortaartoqarpat, takuuk § 27, imm. 3.

6) Ilinniartut ineqarfianni najugaqartup Ilinniartut ineqarfiisa allaffeqarfianneersut najukkamut isernissaat akerlerippagu, § 21, imm. 1. naapertorlugu pisinnaatitaaffigisatik.

7) Torersaarnissamut malittarisassat unioqqutinneqarpat, takuuk § 23.

8) Atortut pequtilluunniit attartorneq pillugu isumaqatigiisummumt atatillugu ilinniartut ineqarfianni najugaqartumut atugassanngortinneqartut paarinerlunneqarpat. Tamanna aamma atortunut pequtinullu ilinniartut ineqarfiata ataatsimut inini katersuuttarfiutaanut atuuppoq.

Imm. 2. Ilinniartut ineqarfiisa allaffeqarfiata attartorneq pillugu isumaqatigiissut taamaallaat atorunnaarsissinnaavaa paarsinerlunneq annertuppat. Inigisamut akiliutissamik akiliisimannginneq annertuujuvoq. Ilinniartut ineqarfiisa allaffeqarfiata attartornermik atorunnaarsitsinnginnerminni ilinniartut ineqarfianni najugaqartoq pissutsinik aaqqeeqqullugu allakkatigut peqqoreersimanngikkuniuk attartorneq atorunnaarsisinnaanngilaat. Ilinniartut ineqarfiisa allaffeqarfiata attartorneq pillugu isumaqatigiisummik atorunnaarsitsinnginneranni pissutsit imm. 1-imi nr. 1-6-imi taaneqartut aaqqinneqarsimappata taakku tunngaviginiarsinnaanngilai, attartornermut isumaqatigiisummik atorunnaarsitsinnginnermi.

§ 42. Ilinniartut ineqarfiisa allaffeqarfiata attartortitsineq erngerluni atuutilersussamik atorunnaarsissinnaavaa, ilinniartut ineqarfianni najugaqartup inissiamut, ilinniartut ineqarfiisa allaffeqarfiannut, taakku sulisorisaannut, ilinniartut ineqarfianni najugaqartunut allanut, ilinniartut ineqarfianniissinnaatitaasunullu annertuumik ajoqutaasumik pissusilersorpat, taamatuttaaq:

1) Ilinniartut ineqarfianni najugaqartoq inunnut pineqartunut nakuuserpat imaluunniit

persuttaanissamik siorasaarippat.

2) Ilinniartut ineqarfianni najugaqartup pissusilersornera inissiamut imaluunniit inunnut pineqartunut ulorianartorsiortitsisinnaappat, matumani ilanngullugit sakkunik atuisimappat imaluunniit ilinniartut ineqarfianni najukkami atortunik ulorianartunik uninngatitaqarpat.

3) Ilinniartut ineqarfianni najugaqartoq ilinniartut ineqarfianni akuutissanik ikiaroorartortalinnik pigisaqartoq atuisorluunniit paasineqarpat, nakorsaaitukkat eqqaassanngikkaanni.

Imm. 2. Attartortitsineq atorunnaarsinneqarsinnaavoq, tamatumani pissusilersornerit imm. 1-imi taaneqartut attartortup inoqutaanit allanilluunniit attartortup attartukkamut isersinnaatitaanit piliarineqarsimappata.

§ 43. Ilinniartut ineqarfiisa allaffeqarfiata attartornermi isumaqatigiissut atorunnaarsippagu, taava najugaqartoq ingerlaannartumik inigisaminit attartukkamit anissaq, aammalu ineqarnermut allanullu attartornermut atasumik akiligassaminik nalinginnaasumik piffissarititaasut naapertorlugit isumaqatigiisummik atorunnaarsitsisoqarneratut akiliisussaataaassaaq. Ilinniagaqartut ineqarfianni najugaqartup paarsinerlussimanermigut ajoqusikkani annaasallu tamaasa taarsissavai, aamma nuutsitaanermi atasumik aningaasartuutit.

Imm. 2. Ilinniartut ineqarfiisa allaffeqarfiata isumagissavaa ineqarfiup attartorteqqinneqarnissaa. Ilinniartut ineqarfiisa allaffeqarfiata piffissami pineqartumi attartortitsisimagaluarunik isertitarisinnaasaat najugaqarsimasumut piunnaasaataasuni imm. 1.-mi pineqartumit ilanngaatinneqassaaq.

§ 44. §§-ini 38-miit 43-mut malittarisassat ima sanioqqunneqassanngillat ilinniartut ineqarfiisa allaffeqarfiata §§ 38-43-mi taaneqartunit allaanerusunik pissuteqarlutik attartorneq pillugu isumaqatigiisummik atorunnaarsitsisinnaassallutik, imaluunniit taakku ilinniartut ineqarfianni najugaqartumut § 38, imm. 2, aamma § 43-mi aalajangersakkanit annertunerusunik kinguneqartussaassanatik.

§ 45. §§-fit 38-miit 43-mut naapertorlugit attartorneq pillugu isumaqatigiisummik taamaatitsinermut atorunnaarsitsinermulluunniit atatillugu ilinniartut ineqarfiisa allaffeqarfiata ilinniartut ineqarfianni najugaqartup inissaqarteqqinissaa pisussaafingngilaa.

Imm. 2. Ilinniartut ineqarfiisa allaffeqarfiata §§ 38-43 naapertorlugit attartorneq pillugu isumaqatigiisummik atorunnaarsitsinermut taamaatitsinermulluunniit atatillugu ilinniartut ineqarfianni najugaqartoq paarsinerluttoq ilinniartut ineqarfianni najugaqartup inissaqartumut mattussinnaavaat. Taamaattoqartillugu mattussineq ilinniartut ineqarfianni najugaqartup piffissamit ilinniartut ineqarfiannik allaffissornikkut aqutsisunik aqqiagiinngissutiminik qaangiineraniit qaammatit 3 sinnernagit siviussuseqassaaq.

Kapitali 10

Ilinniartut ineqarfianni najugaqartup *inigisaq qimallugu nuunna*

§ 46. Ilinniartut ineqarfianni najugaqartup aninermini ilinniartut ineqarfianni najugaq iserternermisut iluseqartillugu tunniutissavaa.

Imm. 2. Ilinniartut ineqarfianni najugaqartup ilinniartut ineqarfiisa allaffeqarfiat akuersitereerlugu

iikkat, qilaat, atortut pequtillu ilinniartut ineqarfianni qalipaatinin aalajangersimasumik atorneqartunit allaanerumik qalipassimappagit qalipaait aalajangersimasumik atorneqartut atorlugit qalipaasoqaqqissaaq.

Imm. 3. Ilinniartut ineqarfianni najugaqartoq nammineq qalipaaqqikkumappat, qaqorsaalluni qalipaajumappat tsapiitilersuimappalluunniit tamanna assassornermik ilinniagaqarsimasut illersorneqarsinnaasumik pitsaassuseqartillugu suliarineqassaaq. Ilinniartut ineqarfianni najukkap qimanneqarnissaa imaluunniit atorunnaarsitsinissaa naapertorlugu inissiap qimanneqarnissaa inissiap takuniarneqarnissaa sioqqullugu suliaq naammassereersimassaaq, tak. § 47.

Imm. 4. Ilinniartut ineqarfiisa allaffeqarfiata nuunnermut atasumik attartortup qularnaveeqqusiissutaa attartornermi isumaqatigiissut naapertorlugu attartortup pisussaaffigisaanik suliaqarnermut assersuutigalugu qalipaanermut, iluarsaanermut eqqiaanermulluunniit atorsinnaavai.

§ 47. Ilinniartut ineqarfianni najugaq qimanneqartussanngorpat ilinniartut ineqarfiisa allaffeqarfiata ilinniartullu ineqarfianni najugaqartup najukkamik misissuisoqarnissaa isumaqatigiissutigissavaat. Ilinniartut ineqarfianni najugaqartoq ilaqaarluni misissuinermit peqataanissamut pisinnaatitaavoq. Ilinniartut ineqarfianni najugaqartoq aamma ilinniartut ineqarfiisa allaffeqarfiat immikkut ilisimasalimmik peqataasoqarnissaanik piumasaqarsinnaapput. Immikkut ilisimassalimmut aningaasartuutaasinnaasut misissuinermit atatillugu immikkut ilisimasalimmit ikiorneqarnissamik kissaateqartumit akilerneqassapput.

Imm. 2. Misissuinissaa pillugu isumaqatigiissuteqarnermut atatillugu ilinniartut ineqarfiisa allaffeqarfiata ilinniartut ineqarfianni najukkap misissorneqarnerani peqataannginnerup kingunerisinnaasai ilinniartut ineqarfianni najugaqartumut allakkatigut nalunaarutigissavaat, § 48 naapertorlugu.

Imm. 3. Misissuinermit ilinniartut ineqarfiisa allaffeqarfia misissuisimanermut nalunaarusiussaaq, tassanilu amigaataasinnaasut paarinerlutallu ilinniartut ineqarfiisa allaffeqarfiata isumaa malillugu ilinniartut ineqarfianni najugaqartup akisussaaffigisassai allassimassapput. Ilinniartut ineqarfianni najugaqartoq taakkununga isumaqataanngippat, tamanna ilinniartut ineqarfianni najugaqartup isumai taallugit nalunaarusiami allanneqassapput. Nalunaarusiaq misissuinermit atatillugu susassaqartunit illuatungeriinnit atsiorneqassaaq. Ilinniartut ineqarfianni najugaqartoq taannaluunniit sinnerlugu takkuttooq misissuinermit nalunaarusiap assinganik tunineqassaaq. Tamatuma kingorna pissutissaqanngitsumik kinguarsaanertaqanngitsumik suliassat ilinniartut ineqarfiisa allaffeqarfiata isumaa malillugu ilinniartut ineqarfianni najugaqartumit akilerneqartussat qanoq akeqarnissaanik missingersuut allakkatigut ilinniartut ineqarfianni najugaqartumut nassiuutissavaat. Taamaakkaluartorli ilinniartut ineqarfianni najugaqartup suliassat amigaataasut nammineerluni suliarisinnaavaai, tamanna pitsanngorsaaneq pissappat ilinniartut ineqarfianni najugaqartup najugarisaminiit nuunnginnerani, nuunnginnermilu ilinniartut ineqarfiisa allaffeqarfia nalileeqqinnissamik isumaqatigiissuteqarfigisimaguniuk.

Imm. 4. Ilinniartut ineqarfiisa allaffeqarfiata paarsinerluttoqarsimanagera aserorterisoqarsimanageraluunniit tungaviginiarunigit ininut qimanneqartunut tungatillugu, tamanna ilinniartut ineqarfiisa allaffeqarfiata immikkut uppersarsassavaa, assersuutigalugu assilisat, videoliat uppersarsaasulluunniit atorlugit. Uppersarsaaneq inunniit ataatsimit amerlanerusunit peqataaffigineqassaaq.

§ 48. Ilinniartut ineqarfianni najugaqartoq taassumaluunniit piginnaatitaa misissuinermit

takkutinngippat, ilinniartut ineqarfiisa allaffeqarfiat pisinnaatitaavoq nalunaarusiaq tunngavigissallugu attartortullu qularnaveeqqusiissutaasa nalinginnaasumik iluarsaassinermut aningaasartuutissanut, takuuk §§ 46, matussutigineqarnissannut aamma attartornermik isumaqatigiissut naapertorlugu ilinniartut ineqarfianni najugaqartup pisussaaffiunut matussutigineqarnissannut atussallugit.

Imm. 2. Ilinniartut ineqarfiisa allaffeqarfiata amigaatit misissuinerup nalaani pissusissaatut malugineqarsinnaasimagaluit piunasaqaatigisinnaanngilaat, tamatumani ilinniartut ineqarfianni najugaqartoq peqquserlulluni iliuuseqarsimangippat.

Imm. 3. Ilinniartut ineqarfiisa allaffeqarfiat inissiami qimanneqartumi paarsinerluttoqarsimaneranik aserorterisoqarsimaneranilluunniit uparuaasimappat, pissutsit annertussusiilu immikkoortillugit uppernarsaaserneqassapput, assersuutigalugu assilisanik, videolianik uppernarsaasinnaasunilluunniit. Uppernarsaasiineq inuup ataasiinnanngitsup peqataaneratigut pissaq.

§ 49. Ilinniagaqartut ineqarfianni najugaqartup kingusinnerpaamik nuunnginnermini ullut arfineq pingasut sioqqullugit ilinniartut ineqarfiisa allaffeqarfiat allaganngorlugu nalunaarfigissavaa saaffiginnissutit adresse-mut sumut ingerlatinneqartassanersut.

Kapitali 11

Maalaarutit

§ 50. Aalajangernerit §§-it 39, 41, 42, 45, imm. 2 aamma 48, imm. 1, kiisalu ilinniartut ineqarfiisa allaffeqarfiata aalajangernerit paarsinerlussimanermut aserorterisimanermulluunniit tunngasut § 47, imm. 3 aamma § 48 imm. 3, aaljangertoqarneraaniit sap. ak. sisamat qaangiutinnagit allaganngorlugit Suliffeqarnermut Inuussutissarsiutinullu Ilinniartitaanermut Pisortaqarfimmut maalaarutigineqarsinnaapput.

Imm. 2. Maalaarutit § 39 naapertorlugu aalajangernerimik atorunnaarsitsisapput. Maalaarutit § 41 naapertorlugu aalajangernerimik atorunnaarsitsisapput, ilinniartut ineqarfiisa allaffeqarfiannit nalilerneqangippat, ineqartup ilinniartunut inissiami najugaqaannarnissaa najukkamut, ilinniartut ineqarfiisa allaffeqarfiannut, tassani sulisuusunut, najugaqartunut allanut, allanulluunniit inissiami susassaqtartunut annertuumik persaqusersuutaassasoq, § 42 naapertorlugu.

Kapitali 12

Atuutilersitsineq

§ 51. Nalunaarut manna 1. december 2007 atuutilerpoq.

Imm. 2. Tassungalu atatillugu atorunnaarsinneqarpoq Kulturimut, Ilinniartitaanermut, Ilisimatusarnermut Ilageeqarnermullu Naalakkersuisoqarfiup kaajallaasitaa nr. 1/2000 ilinniartut inissiaanni Nuummi najugaqartussanik innersuussisarnermut ataatsimiititaliaq.

Siverth K. Heilmann

/

Isak Nielsen Kleist